

Silaannakkut angallannerup tiguneqarnissaa pillugu Naalakkersuisut suleqatigiissitamik pilersitsinissaannut Inatsisartut aalajangiiffigisassaattut siunnersuut.
(Inatsisartuni ilaasortaq Per Rosing-Petersen, Partii Naleraq)

Akissuteqaat

(Kommuninut, Nunaqarfinnut, Isorliunerusunut, Attaveqaqatigiinnermut Ineqarnermullu Naalakkersuisoq)

Siullermeerneqarnera

Naalakkersuisut sinnerlugit Inatsisartuni ilaasortaq Per Rosing-Petersen Partii Naleqqamiit aalajangiiffigisassatut siunnersuuteqarneranut qutsavigaara.

Aallarniutigalugu erseqqissaatigissavara Naalakkersuisut naalakkersuisooqatigiinnissamut isumaqatigiissummi immikkoortut naammassiniarlugit sulimmata, tassanilu silaannakkut angallassinermut oqartussaaffiup tiguneqarnissaa nassuiarneqarpoq. Tassalu Naalakkersuisut suliami Per Rosing-Petersenip siunnersuutigisaani alloriarnerit aallarniutaasut suliarilereerpaat.

Silaannakkut angallassineq suliassa qarfiuvoq pisariusorujussuaq nunani tamalaani maleruagassianik annertuumik atuiffiusoq. Tamanna aalajangiiffigisassatut siunnersuummi Naalakkersuisut suleriaasissatut eqqortutut isumaqarfigisaanni ersersinneqarpoq. Piviusunngortitsinissap tungaanut allorianginnermi suliassa qarfiup, suliat ingerlanissaasa kingunerisassallu sapinngisamik tamakkiisumik allaaserineqarnissaat pingaaruteqarpoq.

2015-imi ukiakkut ataatsimiinnermi immikkoortoq 166 naapertorlugu Kalaallit Nunaata silaannartaata avalliup 19.500 fodinit portunerusumiittup aquneqarnerata Naalagaaffeqatigiinnit tiguneqarnissaa pillugu danskit oqartussaasui oqaloqatigineqarput. Tamanna misissueqqissaarnermik kinguneqarpoq, taannalu maannarpiaq Danmarkimi Assartuussinermut, Sanaartornermut Ineqarnermullu Ministereqarfiup aamma Kommuninut, Nunaqarfinnut, Isorliunerusunut, Attaveqaqatigiinnermut Ineqarnermullu Naalakkersuisoqarfiup suleqatigiillutik suliaaraat. Taanna piareerpat, silaannakkut angallannermik suliassa qarfimmi oqartussaaffiup tiguneqarnissaa pillugu allaaserisaqarnermut pissusissamisuuginnartumik ilanngunneqassaaq.

Silaannakkut angallannermut oqartussaaffiup tiguneqarnissaa pillugu immikkoortoq, Naalakkersuisooqatigiinnissamut isumaqatigiissummi allassimasoq tunngavigalugu Kommuninut, Nunaqarfinnut, Isorliunerusunut, Attaveqaqatigiinnermut Ineqarnermullu Naalakkersuisoqarfiup aamma Mittarfeqarfiit ataanni suleqatigiissitamik, siunnersuuteqartup aalajangiiffigisassatut siunnersuummi siunnersuutigisaanik suliaqartussamik pilersitsisoqarpoq. Tamatumani aamma soorunami Naalakkersuisoqarfiit suleqatillu attuumassutillit peqataatinneqassapput.

Sulinermi suliaasaqarfiit assigiinngitsut tigusinermi sunniuteqarfigineqartussat, kiisalu suliaasat ingerlanissaannut piffissamullu pilersaarutit sukumiisumik nassuiaasioqartussapput. Sulinermi aamma oqartussaasut tungaanniit misissorqartussat tassaapput: inatsisit, nakkutilliineq akuersissutinillu tunniussisarneq. Taakku saniatigut suliaasanik aaqqiiniarnerup aaqqissuussaanissaa allaaserineqassaaq. Tassani ilaatigut Nuummi Timmisartunut Paasissutissiisarfik, ullumikkut Naviair-imit aqunneqartoq, aammalu silaannartamik avallermik, ullumikkut Islandimit Canadamillu aqunneqartumik nakkutilliisuusoq pineqarpoq. Tamatumunnga atatillugu aningaasaqarnermut tunngasortaanik misissueqqissaarnissaa pingaaruteqarpoq, taakkunungalu ICAO-mut pisussaaffiit aamma ICAO-mi Joint Finance Agreement aqutigalugu suliaasanik isumagineqarnissaannut aningaasalersuisarnerit ilaatinneqassapput.

Suliasami nunatsinni silaannakkut angallannermi siunissami suliaasat pissanganaatilerujussuit nassuiarneqassapput, aammalu Naalakkersuisuniit Per Rosing-Petersen suliamut soqutiginninneranut isumalluarneranullu taperserparput. Silaannakkut angallannermi oqartussaaffimmik tigusinissami unammilligassat annertupput, kisiannili Kalaallit Nunaata nunap iluani nunanullu tamalaanut silaannakkut angallannermi akisussaaffimmik annertunerusumik tigusinissaa isumalluarnartoqarpoq. Tamatuma saniatigut Kalaallit Nunaanni suliffissanik pilersitsinissaa periarfissaqassaaq.

Matuma siuliani taaneqartut tunngavigalugit aalajangiiffigisassatut siunnersuutip akuerineqarnissaa Naalakkersuisut inassutigaat.